

萬有文庫

第二集七百種

王雲五主編

讀史方輿紀要

(三十)

顧祖禹輯著

商務印書館發行

讀史方輿要記

(三十)

顧祖禹輯著

萬有文庫

第二集七百種

總編纂者

王雲五

商務印書館發行

讀史方輿紀要

卷三十六

山東七

萊州府

東北至登州府二百四十里。東南至海二百五十里。西南至青州府莒州四百五十里。西至青州府三百十六里。北至海九十里。自府治至布政司六百四十里。至京師千四百里。

禹貢青州地。春秋時萊子國。

禹貢萊夷作牧。春秋時齊侯伐萊子於郕。或曰郕即今郡治。在齊之東。故曰東萊。

戰國屬齊。秦屬齊郡。漢曰東萊郡。後漢

因之。晉爲東萊國。宋復曰東萊郡。後魏因之。兼置光州。隋郡廢。開皇五年改光州曰萊州。大業初曰東

萊郡。唐復曰萊州。天寶初亦曰東萊郡。乾元初復故。宋仍曰萊州。

亦曰東萊郡。

金因之。

亦曰定海軍。

元亦爲萊州。屬

益都路。尋屬般陽路。明朝洪武九年升爲萊州府。領州二縣五。

府內屏青齊。外控遼碣。藉梯航之便。爲震疊之資。足以威行海外。豈惟島嶼之險。足以自固乎哉。

唐史。貞觀

十五年太宗言高麗本四郡之地昔發卒數萬攻遼東彼必傾國救之別遣舟師出東萊自海道趨平壤水陸合擊取之不難也

掖縣

附郭戰國時齊夜邑襄王益封田單於夜邑萬戶又魯仲連謂田單將軍有夜邑之奉是也漢置掖縣東萊郡治焉後漢移郡治黃縣又封歐陽歙爲夜侯即掖也晉復爲郡治劉宋又移郡治曲城縣後魏以後州郡皆治此今編戶八十二里

曲成廢縣

府東北六十里漢縣屬東萊郡高帝封功臣壘達爲侯邑又武帝封中山靖王子萬載爲曲成侯後漢又封劉建爲侯邑仍屬東萊郡晉曰曲城縣劉宋爲郡治後魏曰西曲城縣分東境置東曲城縣並屬東萊郡北齊省隋末復置曲城縣唐

武德六年廢入掖縣

今郡城周九里有奇

當利城

在府西南三十六里漢縣屬東萊郡志云武帝封樂大爲當利將軍命其邑曰當利後漢及晉宋因之後魏改屬長廣郡北齊廢入掖縣隋末復置唐武德六年廢

陽樂城

在縣北漢縣屬東萊郡後漢廢志云縣北二十里有臨胸故城此東萊郡之臨胸也又縣南有陽石廢縣亦漢置屬東萊郡俱後漢廢○曲臺城在府東南唐武德四年置曲臺縣屬萊州六年廢又府東北二十里濱海有沙邱廢城相傳商紂所築

似誤

福山

府西北五里俗名斧山峯嶺高峻北臨滄海其並峙者曰祿山○大基山在府東十里有道士谷巘嶒蒼翠泉流潺湲又東五里爲神仙洞其相連者有洞凡七俱幽勝

高望山

府南十五里峯巒秀特可以望遠又南五里爲天柱山一名南山又寒同山在府東南三十五里一名神山掖水出於此○三山島在府北五十里海之南岸史記封禪書八祀四曰陰主祠三山唐史貞觀二十二年將伐高麗詔劍南大治船艦儲

糧械於三山浦及烏島。烏島或曰即登州之烏湖島。又蜉蟬島在府西北百里海中遙望若蜉蟬然。

萬里沙

府東北三十里夾萬歲水兩岸皆沙長三百里。史記封禪書天子既出無名乃禱萬里沙。漢書郊祀志武帝元封元年旱禱萬里沙是也。

海

在海西北二十里道出遼東朝鮮通典郡北至海五十里西至海二十九里西北至海二十里東南至海二百五十里今自府西北環昌邑濰縣界東南環膠州即墨縣界皆大海也。

掖水

在府東南十五里源出寒同山西北流經城南又西北注於海。○萬歲河在府東北三十里其兩岸即萬里沙也。秦始皇漢武帝皆嘗禱此三齊記水北有萬歲亭漢武所築。

小沽河

出府東南三十里馬鞍山東南流經平度州與大沽河合經膠州即墨縣界入於海。左傳昭二十年齊晏子曰聊攝以東姑尤以西其爲人也多矣。杜預曰姑即大沽河尤即小沽河也。○五龍泉府西三里瀦而爲池凡半畝許民獲灌溉之利又城

東有青龍泉

與濰水相接

過鄉

在府北後漢郡國治掖縣有過鄉故過國寒浞封其子澆於此春秋哀元年傳寒浞處澆於過處殪於戈。杜預曰過即掖縣過鄉戈在宋鄭間。○燕臺在府東北二里志云南燕慕容德以掖城爲青州治因置此臺。

海倉口鎮

府西北九十里即膠河入海之口爲濱海要地有巡司戍守又柴葫寨在府北五十里亦有巡司。○朱橋驛在府東北七十里又南關有城南驛又沙河店在府南三十里舊置城南沙河店朱橋店三遞運所萬歷中與驛俱革。

附見

萊州衛。

在府治東南。洪武三年置。領左右中前後五千戶等所。

王徐寨備禦前千戶所。

府東北八十里。明初置百戶所。有城周三里。嘉靖中改爲千戶所。○馬埠寨備禦百戶所。在府西二十五里。城周二里。又龍河寨備禦百戶所。在府北五十里。所城周二里有奇。又東北百六十里。有馬停寨。

備禦百戶所。所城不

及一里。俱屬萊州衛。

平度州。

府南百里。南至膠州百二十里。西南至青州府莒州三百四十里。

春秋時齊地。漢屬東萊郡。後漢屬北海國。晉屬濟南郡。劉宋屬北海郡。後魏因之。隋屬萊州。唐宋仍舊。

元改屬登州。明洪武九年。改屬萊州府。二十一年。始置平度州。

編戶百三十六里。

領縣二。

州西互濰河。北枕渤海。山川襟帶。屏蔽東陲。

膠水廢縣。

今州治。本漢之平度縣地。後漢改置膠東縣。屬北海國。晉宋後魏皆曰膠東縣。後齊改置長廣縣。屬長廣郡。隋改屬萊州。仁壽初改曰膠水縣。唐宋元因之。洪武中置平度州。以縣省入州。城周九里有奇。

平度故城。

州西北六十里。漢縣治此。屬東萊郡。武帝封菑川懿王子行爲侯邑。後漢并入膠東縣。○盧鄉城。在州西北五十里。漢縣屬東萊郡。晉宋及後魏因之。北齊省入膠東縣。隋復置。屬萊州。唐貞觀初縣廢。

即墨故城

州東南六十里。齊即墨邑。志云：城臨墨水，故曰即墨。齊威王封即墨大夫，而烹阿大夫。湣王時，樂毅破齊七十餘城，惟莒、即墨未下。既而田單以即墨攻破燕軍。漢元年，項羽徙齊王田市爲膠東王，而即墨田榮追擊市於此，殺之。四年，韓信破齊，齊將田既走膠東。曹參擊殺之，卽即墨也。尋復爲即墨縣，屬齊國。文帝十六年，分齊地封悼惠王子白石侯熊渠爲膠東王，都即墨。景帝三年，反誅。四年，封子徹爲膠東王。中二年，改封子寄。後漢國廢，建武中，封賈復爲侯邑，屬北海國。晉屬濟南郡。劉宋復屬北海郡。後魏屬長廣郡。後齊廢。志云：城北有樂毅城，殺攻即墨時所築。漢初田肯曰：齊東有琅邪，即墨之饒，蓋二縣近海，財用所近也。今俗稱故城爲朱毛城。○膠東廢縣亦在州東南。隋未置，唐初屬萊州。武德六年廢。

天柱山

州北五十里。絕頂巉巖，聳立如柱。又有石竈如屋，州人謂之劈石口。通志：山之東曰之萊山，東連大澤，御駕明堂諸山。○墮呀山在州北三十里，以山形墮呀而名。

大澤山

州北七十里。巖壑絕勝，有瑞雲峯。峯頂半巖，疊石爲城，謂之皇城頂。或以爲赤眉故砦也。下有白虎谿，乳泉河出焉。西南流入膠水。山之北卽高望山，接掖縣界。○明堂山在州東北四十里，產藥材，有藥石，水出焉，流合石濱河而注於膠水，其相接者曰金泉山，亦產藥材。又有兩髻山，在州東北十三里，山椒並列如縮雙髻。現河出焉，經州東三里，西南流入膠水。

三固山

州西七十里。一名三戶山。漢郊祀志：宣帝信方士言，祠太室山於即墨，三戶山於下密，卽此山也。又州西十八里有文武山，兩山相峙，世傳秦始皇東巡，集文武於此，因名。下有秦王河。○大豁山在州西北十五里，伏琛齊記：盧鄉縣東南有大豁口，

與小豁口相峙，中通驛路，卽此山也。蘇村河出焉，西南流入於膠水。

膠水

州西八十里，源出膠州鐵嶺山，流經高密縣北入州境，又北經昌邑縣，至縣東北入海。梁天監五年，將軍劉思効敗魏青州刺史元繫於膠水，卽此。○墨水在州東，源出東北六十里之墨山，南流經即墨縣入海。

大沽河

州東八十里。源出登州府黃縣南蹲犬山。經招遠、萊陽。二縣界。至州東南故卽墨城。與小沽河合。經膠州卽墨縣界入海。通謂之沽水。南北經流三百餘里。

新河

在州東南。源出高密縣。流經此。分南北二流。南自膠州麻灣口入海。西北自掖縣海倉口入海。卽元人所濬膠萊河舊道也。元史至元十七年。萊人姚演獻議開新河。由膠西縣東陳村海口西北達於膠河。出海倉口。由海道達直沽。以通漕。謂之膠萊新河。從之。勞廢不貲。卒無成效。二十二年。罷其役。明正統六年。昌邑人王坦言。漕河每患淺澁。海運又虞艱險。請濬新河故道。不允。嘉靖十一年。按臣方遠宜等復議開新河。不果。隆慶初。萊人崔旦復極言新河之便。萬歷三年。又以南京工部尙書劉應節言。命侍郎徐枋開浚。議者極言非便。遂中止。其後屢議屢阻。迄無成績。圖說云。自淮河入河北岸隔一里爲朱家河。可開通。經新溝至安東縣。有澳河。濬水三丈。俱臨淮可通。東則有東漣河。朱家河。白家溝。七里。流入淮。又東有鹽場河。平望河。界首河。白限河。牛洞河。車軸河。流入海。俱宜築塞。中有過蠻河。在淮海之交。可置閘以殺水勢。西則有沐陽水。濶而爲大湖。傅湖。又有楊家溝。西漣河。崔家溝。古閘河。皆爲入漣河水道。自支家河至漣河海口。計三百八十里。出海由海州贛榆至山東界。歷安東衛石臼所。夏河所。靈山衛。膠州瞭頭營。至麻灣海口。計二百八十里。隔馬家濠五里。可以開通。經把浪廟。新河口。店口社。陳村小閘。戴高。劉家大閘。王朱。杜家村。至平度州。又經窩舖。停口。大成昌渠。小閘。新河集。秦家莊。海倉口。至大海口。計三百七十五里。大海口至直沽。四百里。通計一千四百三十五里。應節奏言。膠州南自淮子口大港頭出海。自州治西抵匡家莊四十里。俱岡溝黃土。宜開。自劉家莊北歷臺頭所。張奴河。至亭口。隔三十里。俱黑泥下地。水深數尺。宜浚。自亭口隔歷陶家崖。陳家口。孫店口。至玉皇廟六十里。河寬水淺。宜於舊河之旁。別開一渠。玉皇廟至楊家園二十里。水深數尺。宜浚。楊家園以北。則悉通海潮。無煩工作矣。以工力計之。創者什五。因者什三。略施工者什二。以地勢計之。宜挑深丈餘者什一。挑深數尺者什九。枋言匡家莊地高難開。改於都泊船路溝。地形平衍。有河可引。宜建牐設櫃。如會通河故事。科臣王道成言。膠州在兩海口之中。土最高厚。萬一巨石隱伏。功將安施。雖一水性湍急。走石流沙。卽有泉源。易盈易涸。難二海船不可入河。河船不可入海。難三也。又寶錄。隆慶五年。山東臣僚會勘膠河上言。從龍家屯北至分水嶺。俱係岡

阜沙石難以施工。由分水嶺又北至謝家口。稍有斷續河流。旱潦難恃。沙石亦多由謝家口北至楊家圈。河流似有端緒。又北至新河。開面河勢比南面較寬。自新河開至海倉。又皆流沙壅淤。難以行舟。新河關係往來通渠。過者見有河流。妄意可以開浚。不知迤南十里。便復不同。分水嶺本名王乾壩。兩頭俱有河形。中間積沙高亢。本非嶺也。新河既無泉源。引導必須旁水接濟。而分水嶺下僅有白河一道。平時涓涓細流。淫潦時挾流沙衝淤。大爲河患。其張奴河。膠河九穴泊之水。雖接新河。而源流淺澁。潦涸無時。皆不足恃。若欲東引沽河。則地勢東下。沽河自東而南。直趣麻灣口。難以挽之而北。若西引濰河。濰河在高密西。離新河百二十里。中高嶺五層。又難引之使東也。若欲深鑿河身。使海水南北貫通。則分水嶺諸處。高過海面數丈。命工開鑿。未及數尺。下卽糜沙。隨時奔潰。縱多捐財力。萬難開濬。旣而徐斌亦稱南北海口。俱有積沙橫絕。及分水嶺河高海下。勢不可通。須另開一路。及海口築隄。以約水障沙。又云。南自麻灣抵朱舖五十里。北自海口抵亭口百八十里。皆通潮。可乘潮以導河。撫臣李世達勘稱。南潮止及陳村。開距海口二十里。北潮止及楊家圈。距海口六十里。其朱舖亭口者。非烈風迅雨。海水漲溢。歲不一二至。潮不足恃也。役遂止。崇禎十二年。戶部郎中沈廷揚試行海運。復請開膠萊河。十六年。命戶工二部發銀十萬兩開浚。事未行。而京師不守。餘詳見膠州。

定渠。州南七十里。與州東北之藥石水及石濱河合。流入膠水。一名定都渠。近志以爲鉅定。悞也。

亭口鎮。州西南七十里。卽膠萊河所經。有巡司戍守。又州西北七十里。有灰埠驛。

濰縣。州西百八十里。西南至青州府昌樂縣五十里。漢下密縣。屬膠東國。後漢初廢。安帝時復置。屬北海國。晉屬濟南郡。宋屬北海郡。後魏因之。尋爲北海郡治。後齊改郡曰高陽。隋開皇初郡廢。十六年。於縣置濰州。大業初州廢。改下密縣曰北海。仍屬北海郡。唐初亦置濰州治此。武德八年州廢。以北海縣屬青州。宋建隆三年。置北海軍。乾德二年。升爲濰州。金因之。元屬益都路。明朝洪武初。以州治北海縣省入。屬青州府。九年。降州爲縣。屬萊州府。二十二年。改今屬。編戶八十六里。

下密城

縣西三十里。志云：漢縣治。今平度州西五十里。一云：治今縣東南。水經注：濰水逕下密故城西。是也。後遷今縣治。隋開皇六年置濰水縣。屬青州。大業初改下密爲北海縣。而改濰水爲下密。唐初屬濰州。武德八年州廢。縣併入北海。俗以此爲西下

也。密

平壽城

縣西南三十里。漢縣。屬北海郡。後漢初張步爲耿种所敗。自劇奔平壽。步平仍屬北海郡。晉爲濟南郡治。劉宋仍屬北海郡。後魏爲北海郡治。高齊廢。又西南五十里有斟城。古斟尋國。亦禹後也。又太康居斟尋。羿亦居之。桀又居之。杜預曰：平壽有

斟亭。古斟尋也。后羿所滅。漢置斟縣。屬北海郡。後漢廢。又寒亭在縣東北三十里。杜預曰：平壽東有寒亭。即古寒國。蓋寒浞所封。唐初有寒水縣。屬濰州。武德六年廢。即故寒亭矣。今有寒浞水。北入海。通志：縣南三十里有營邱城。似悞。今詳見青州府昌樂縣

塔山

縣東南六十里。東丹河發源於此。水經注：濰水出塔山。是也。唐天寶初。勅改爲漚原山。〇几山在縣西南七十里。山形如几。西丹河出焉。又縣西南二十里有程符山。相傳公孫宏貧時牧豕處。又有孤山。在縣西南四十里。巋然天際。翠靄若浮。

擂鼓山

縣南百里。與昌樂縣接界。白狼河出焉。其相近有摩旗山。宋嘉定中。金益都賊楊安兒敗死。其妹四娘子爲餘黨所推。掠食至摩旗山。濰州賊帥李全以衆附之。即此。

濰水

縣東南六十里。自青州府安邱縣北。流入縣境。又東北經昌邑縣。東北入於海。後魏主子攸建義初。邢杲帥河北流民反於青州之北海。遣將軍李叔仁擊之。敗於濰水。即此。志云：今縣西北二十里。地名韓信道。蓋以信破楚將龍且於濰水上而名。餘詳

見安邱縣

東丹河

縣東南五里。源出塔山。即濰水也。亦曰東于河。西北流合青州府壽光縣界之丹河。後流入縣境。東北注於海。又西丹河在縣西二十里。源出几山。亦曰西于河。西流合昌樂縣西之丹河。復會東丹河。東北入海。〇白狼河在城東。源出擂鼓山。流入

昌樂縣界。合白狼河別源。又北流入縣境。經東門外。東北流八十里入海。狼一作浪。志云。縣南有小王莊。平地泉湧如輪。卽白浪河之源也。今詳見昌樂縣。

固堤店

縣東北四十里有巡司。又縣東北三十里有古亭馬驛。

昌邑縣

州西北百三十里。西南至青州府壽光縣九十里。漢都昌縣地。屬北海郡。晉初屬齊國。尋廢。劉宋復置。仍屬北海郡。後魏因之。隋開皇中。屬濰州。大業初。仍屬北海郡。唐初亦屬濰州。武德六年廢。宋建隆三年。置昌邑縣。屬北海軍。尋屬濰州。金元因之。明

洪武九年。改屬萊州府。二十

一年。改今屬。編戶九十四里。

都昌城

在縣西。本齊邑。齊頃公賞逢丑父之功。食邑都昌。晏子春秋。景公封晏子以都昌。辭而不受。漢置都昌縣。高帝封功臣朱軫爲侯邑。建安初。北海相孔融被黃巾賊管亥圍於都昌。先主救却之。今城南五里有大營城。北五里有小營城。俗爲大營小

營二村。相傳卽孔

融與黃巾相拒處。

訾城

縣西北三十里。春秋莊元年。齊師遷紀邢。鄆。杜預曰。都昌西有訾城。鄆亦訾。本一城也。唐武德二年。置訾亭縣。屬濰州。六年廢。俗呼爲瓦城。半爲水漸。一云訾城在縣西北十五里。又十五里爲鄆城。

密鄉城

在縣東南十五里。左傳隱二年。紀子伯莒子盟於密。卽此地也。漢置密鄉縣。屬北海郡。武帝封膠東頃王子林爲侯邑。後漢志。瀋子縣有密鄉。應劭曰。瀋子東北六十里有平城亭。又四十里有密鄉亭。故縣也。瀋子見前安邱縣。○平城故城在縣西

南四十里。漢縣。屬北海郡。後漢省。水經注。濰汶二水會於

淳于城東北。又東北逕密鄉亭西。皆漢北海郡屬縣云。

東山

城東二里，俗名土埠，亦謂之東京埠，長數里，石磴崎嶇，峯巒奇秀。後漢建安初，袁譚據青州，攻北海相孔融於都昌，融敗走東山，即此。又縣東南二十里有青石埠，長數里，亦名青山。○霍侯山在縣南四十里，漢書霍光封博陸侯，食邑於北海，此山本

名陸山，或以爲卽光所食邑。唐天寶六載，賜名霍侯山。

又南五十里有峽山，狀如伏虎，俯臨濰水，爲邑之勝。

海

在縣北五十里，有魚兒浦，巡司爲濱海戍守處。

濰河

縣東二里，又東北注於海。志云：縣東五里有濰水堤，宋初築以防濰水泛溢。又縣西南二十里有浮糠河，縣南二十里有張固河，流合浮糠河，並入於海。

膠河

縣東五十里，自平度州流入境，北注於海，其入海處曰海倉口，與掖縣接界。羅氏曰：自海倉口至膠州麻灣，凡二百七十里，卽膠東新河之道也。

棠鄉

縣南八十里，本萊邑，左傳襄六年，齊人伐萊，萊共公浮柔奔棠，晏弱圍棠，遂滅之。又孟子：國人皆以夫子將復爲發棠。後漢志：卽墨有棠鄉，今爲甘棠社。○夏店馬驛在縣東北二十里，又縣東四十里有新河橋遞運所，今革。

膠州

府南二百二十里，東至海三十里，南至海九十里，西至青州府莒州二百八十里。

春秋介國地，戰國屬齊，漢屬琅邪郡，後漢屬東萊郡，晉屬城陽郡，劉宋屬高密郡，後魏嘗置膠州。

魏收志永

安二年置，治東武縣，見青州府諸城縣。

隋屬密州，唐宋因之，元至元十二年，置膠州於此，隸益都路，明洪武初，以州治膠西縣。

省入屬青州府。九年改今屬。編戶九十三里。領縣二。

州聯絡淮沂。屏蔽齊兗。控海道之咽喉。爲登萊之襟要。防險說。膠州卽墨。皆迫近海澨。而卽墨南望淮。安安東。東海衛所諸城。左右相錯。如噤喉關鎖。倭若犯淮。則漸必犯萊矣。故登萊三營之設。卽墨一營。

視登州。文登二營。尤爲切要。

海防攷。自登州之大嵩衛至府境鰲山。靈山衛。及青州府境之安東衛。盡南面濱海之險。皆卽墨營控禦處也。其濱海要衝。則有雄崖。膠州。大山。浮山。夏河。石臼等所。乳山。行村。栲櫟島。古鎮。

逢猛。南龍灣。信陽。夾倉諸巡司。及海中之唐家灣。大任。陳家島。鷓兒。栲櫟。天井灣。顏武。周疇。松林。全家灣。青島。徐家莊一帶。而海道之險。則自安東以北。若勞山。赤松。竹竿。旱門。劉公之杲。八角。沙門。三山諸島。皆賊停泊之處。不可不講。至於白蓬頭。槐子口。橋。雞鳴嶼。金嘴。石倉廟諸處。淺灘亂磯。則賊所必避。而亦吾所當審者。

膠西廢縣。

今州治。漢黔陬縣地。隋開皇十六年。置膠西縣。屬密州。唐武德六年。省縣入高密。以其地爲板橋鎮。宋元祐二年。復置膠西縣。兼領臨海軍使。仍屬密州。金仍曰膠西縣。宋史。嘉定四年。時膠西當登州。寧海之衝。百貨輻輳。李全使其兄福守之。

爲窟宅。多收互市之利。元置膠州。

治此。明初省。今城周四里有奇。

掖城。

州西南七十里。漢掖縣。屬琅邪郡。掖音費。後漢省。又介根城。在州西南五里。春秋時莒邑也。左傳襄二十四年。齊侯伐莒。取介根。應劭曰。周武王始封茲輿於此。卽呂之先也。春秋初徙於莒。漢置計斤縣。屬琅邪郡。顏師古曰。計斤卽介根。語音有輕重。後

漢縣廢。杜預曰：黔陬東北有計基城，卽古介根。今有兩塔對立，曰東西計斤。又有介亭，在州南七十里。志云：卽古之介國。春秋僖二十九年，介葛盧來，是也。杜預以爲介國在黔陬縣界。

祝茲城

亦在州西南。漢高封徐厲爲侯邑。又孝武封膠東康王子延年於此。水經注：膠水出五弩山，北逕祝茲城。又經郛縣故城。郛音扶，亦漢琅邪屬縣也。文帝封呂平爲侯邑。後漢縣廢。又通志云：州南七十里，有古長城。

鐵櫟山

州西南百二十里。膠水發源於此。亦曰膠山。志云：五弩山在膠山之北，膠水出膠山，過密州五弩山，南水入焉。又北逕州南三十五里之艾山，艾水入焉。又艾山旁有天澤泉，卽艾水之源也。鐵櫟山蓋與諸城五弩山相近。

大珠山

州南百二十里濱海，上有石室，珠亦作朱。通典：高密諸城縣有古長城，自齊西防門東逾泰山、穆陵，至大朱山海濱而絕。是也。又州南九十里有小珠山，錯水出焉，流入海。○靈山在城東南百二十里海中。志云：在靈山衛南三十里，其山先日而曙。

先雨而雲，故謂之靈。又衛西北三里有小竹山，或謂之小竺。又衛東海中有唐島，相傳唐太宗征高麗，駐蹕於此，內有飲馬池。

石臼島

州南百里海中。宋紹興三十年，金亮入寇，分遣一軍由海道襲浙江，以兵圍海州。宋將李寶督海舟捍禦，至石臼島，敵舟已泊唐島，相距僅一山。寶因風便，過山薄寇，大敗金人。海道之師遂絕。○黃島在州東南六十里海中，舊有居民，後因倭寇，其

地遂墟。又州東南九里有薛家島，橫伏入海，每爲行旅患。又古鎮島，在州東南百十里海中，有巡司戍守。志云：膠州濱海，石臼、青泥、桃林、陳家、李家、薛家、古鎮、黃島，唐島之屬，皆其著者。

海

州東三十里。志云：州南門外有唐家灣。宋元時，海舶往來皆由此。

膠水

在州西，出鐵櫟山，東北流，接高密縣境。又北入平度州界。水經注：膠水出膠山，北逕黔陬故城西，是也。又有洋河，亦出鐵櫟山，東流逕城南三十里入海。水經注：拒艾水一名洋洋水。宋泰始三年，輔國將軍劉懷珍擊青州刺史沈文秀於東陽，進至黔陬。

軍於泮水。遣別將王廣之襲不其城。拔之。此泮泮水也。○
沽河在州東北三十里。自平度州流入境。又南流入海。

新河

州東北三十里。西北入高密縣界。志云。州東南百里有馬家濠。濠長三里餘。夾兩山中。南北俱接海口。元至元十九年。開膠萊新河。阻馬家濠。不就明朝嘉靖十一年。按臣方遠宜議開新河。以馬家濠數里皆石岡爲患。臬使王獻焚以烈火。鑿而通之。十九年。獻言元人海運。自淮安循海而行。至靈山之東。浮山。潞山之西。有薛島。陳島。石呀林。立橫伏海中。若橋號槐子口橋。最險難越。元人避之。故放泮於三沙黑水。歷城山正東。踰登州東北。又西北抵萊州海倉。然後出直沽以達天津。獻閱膠萊河圖。自薛島之西。有山曰小竺。兩峯夾峙。中有石岡。曰馬壕。馬壕之麓。南北皆接海涯。而北卽麻灣。又稍北卽新河。又西北卽海倉。直沽由麻灣抵海倉。三百三十里。由淮安踰馬壕抵直沽。千五百里。若徑出於此。可免遶海之患。元人嘗治此道。遇石而止。今因其故迹。鑿馬壕以趣麻灣。長十四里。廣六丈有奇。深半之。而江淮之舟。可達新河。新河兩旁。皆有水泉溢出。疏淺決滯。爲九閘以節宣之。可以佐會通河之窮。從之。於是於舊濠迤西七丈有餘。鑿渠通舟。以達新河故道。爲漕運之計。功未半而罷。萬曆初。復議開膠萊河。山東參政馮敏功謂。膠河一衣帶水。餘悉高嶺大阜。且地皆岡石。山水奔瀑。功難竟。卽竟矣。海水挾潮沙而入。必復淤。及開濬。果以岡石黑沙難施。畚插而止。河渠攷。元人于欽言。至元中。姚演請開新河。鑿陸地數百里。以通漕。數年而罷。余過其地。詢之土人云。此河爲海沙所壅。又水潦積淤。終不能通。蓋元志所稱。勞費無成。非誣也。自王獻建議之後。屢行勘閱。隆慶四年。嘗議濬治。至萬曆三年而罷。二十九年。御史高舉復議濬之。卒不果。迄崇禎之季。言者猶以爲請。竟不果行。

逢猛鎮

州南四十里。爲濱海戍守處。有巡司。又東南百二十里有古鎮巡司。

高密縣

州西北五十里。西南至青州府諸城縣百二十里。秦爲高密縣。屬齊郡。漢初屬齊國。文帝十六年。分齊地置膠西國。宣帝本始初。更爲高密國。皆治高密縣。後漢建武中。封鄧禹爲侯邑。改屬北海國。晉屬城陽郡。惠帝復置高密郡。劉宋仍屬高密郡。後魏

因之。隋屬密州。大業末廢。唐復置。仍屬密州。宋因之。元屬膠州。今編戶八十八里。

高密城。

縣西南四十里。縣本治此。漢三年。齊田橫烹酈生。走高密。明年。韓信破齊軍。至臨菑。齊王廣亦走高密。文帝封齊悼惠王子卬爲膠西王。都高密。是也。後漢仍爲高密縣。又謂之城陰城。鄭元碑。城陰卽高密也。隋末廢。唐武德三年。於今縣西北一里故義城堡置高密縣。六年。移治於故夷安城。卽今縣也。○夷安城。通典曰。今縣外城也。應劭曰。古萊夷維邑。晏平仲夷維人也。漢置夷安縣。屬高密國。後漢屬北海國。鄧禹少子封夷安侯。卽此。晉屬城陽郡。惠帝時復屬高密郡。劉宋後魏因之。後齊廢。唐爲高密縣治。

稻城。

縣西南五十里。灘水堰側。漢縣屬琅邪郡。武帝封齊孝王子定爲侯邑。後漢縣廢。志云。舊有塘堰。蓄灘水溉田。因名。亦謂之鄭城。有康成故宅也。旁有稻田萬頃。斷水造魚梁。歲收億萬。號萬正梁。今堙。城邑攷。縣西南五十里。灘水東。又有龍且城。城西卽且冢。南曰梁臺。卽韓信擊殺龍且之地也。

柘城。

縣南三十里。舊志。柘城在膠州西南九十里。是也。漢縣屬琅邪郡。柘音巨。後漢改屬北海國。後省。今縣西南三十里有柘城河。出縣南五十里土子山。流入九穴泊。蓋因故城而名。水經注。黔陬西南有柘艾山。亦曰黔艾山。柘艾水出焉。流經柘縣故城西。東北入海。蘇林以爲根。艾水卽膠州之洋河也。

黔陬城。

縣西六十里。古介國。漢置黔陬縣。屬琅邪郡。後漢屬東萊郡。晉屬城陽郡。劉宋屬高密郡。泰始三年。青州刺史沈文秀據東陽。詔劉懷珍進向青州。懷珍至黔陬。文秀所置高密。平昌二郡太守棄城走。後魏仍屬高密郡。後齊置平昌郡於此。隋開皇